

那文毅公奏議

那文毅公初任直隸總督奏議卷四十目錄

卷四十

飭緝逆黨

邵文毅公初任直隸總督奏議卷四

飭緝逆黨

嘉慶二十年五月初四日

奏爲奏

聞事竊查次要逆犯內有劉玉隴一名直隸饒陽縣人前
因緝拏無獲密飭該縣隨時訪緝在案嗣據臬司
盛泰轉據饒陽縣知縣陳晉稟稱訪得安平縣西
關人張五與劉玉隴一同學金鐘罩平素最爲交
好誠恐劉玉隴在彼藏躲該縣適赴安平縣代驗

命案順道前往偵緝詎張五早已挈眷搬赴山東
臨清州居住等情經該司派委候補未入流喻振
恒帶同眼目馳往臨清將張五拏獲押解來直稟
經臣督同該司暨保定府知府阿霖研訊據張五
供稱我於嘉慶十年間與劉玉隴隨山東冠縣西
河口人郭洛雲學金鐘罩郭洛雲是山東邱縣甘
集人張洛焦徒弟劉玉隴與張洛焦認識後來我
在山東臨清州際昌號充當鹽店巡役把家眷也
搬去居住有時仍回到原籍安平縣走動上年四
月底我在臨清州西城莊地方與素日認識的饒

陽縣人魏老有撞遇魏老有說起劉玉隴約他到無爲州販賣私鹽在郭洛雲家會齊不過一二日內就走的話以後就不見魏老有的面如今劉玉隴魏老有是否在無爲州我不知道等語臣查山東冠縣卽縣均與直隸清河縣交界隨飭委河間府知府彭應杰帶同喻振恒馳往該處密拏郭洛雲等去後茲據彭應杰稟稱該員帶同喻振恒馳赴清河縣該縣黃湘寧選派家丁陳魁馳赴卽縣甘集地方扮做布客逐細訪查張洛焦已於兩月前將產業變賣全家外出親至其家查看只剩破

屋兩間其餘房屋均已拆毀後隣卽係張洛焦之
姪訊據供稱張洛焦素習拳棒近因年景不好挈
眷外出或至江南豐沛一帶或至河南少林寺不
定等語又至冠縣西河口訪查郭洛雲已於正二
月間外出家中尙有妻子訪詢地隣人等僉供郭
洛雲素習拳棒聞往京城等語稟覆前來臣查張
洛焦郭洛雲平日均習拳棒劉玉隴係郭洛雲之
徒今張洛焦郭洛雲均經外出張洛焦且係無故
變產拆屋挈眷而去或至江南豐沛一帶或至河
南少林寺不定其行蹤更覺詭秘事有可疑郭洛

雲據地隣供稱係赴京城若將該二犯獲案則劉
玉隴踪跡即可根究臣誠恐委員隔境訪查未能
得其確耗現已密信知會山東巡撫轉飭各地方
官差傳張洛焦等地隣到案訊追張洛焦等實在
下落一面分咨江蘇河南及步軍統領順天府尹
各衙門遍爲訪緝務期就獲至劉玉隴一犯據張
五供稱魏老有向其告知有約赴安徽無爲州販
私之語臣現亦知會兩江總督並安徽巡撫派委
幹員不動聲色前往嚴密訪緝張五一犯暫押備
質再視現等各犯現仍嚴飭躡訪謹

奏

容安謹按軍機處知會此件已奉

上諭交山東等省並步軍統領等衙門一體緝拏

嘉慶二十年五月二十五日

奏爲拏獲張五供出之郭洛雲並分咨江南山東兩省
查拏劉玉隴恭摺奏

聞事竊據清河縣知縣黃湘寧訪得郭洛雲業已回至原
籍冠縣西河口五月初七日赴該縣小屯集趕集
隨選帶丁役密往將郭洛雲拏獲押解來省臣督
同臬司盛泰詳細研鞫據郭洛雲供稱冠縣西河

口人年三十九歲嘉慶二三年間向冠縣甘集人
張洛焦學習金鐘罩又向邯縣辛店人尙際亭學
習八番拳尙際亭故後又向邯縣丙家莊人馮世
禮學習鎗棍刀法八年間我到臨清州趕廟會合
素識的臨清州人劉洛常會遇見他同了兩箇人
在茶舖裏吃茶當向詢問一名劉玉隴是饒陽縣
支窩村人向做鑿磨生理一名尙洛載是深州代
疇人向來縫皮說起都會拳棒因此講成相好劉
玉隴尙洛載邀我到他們家去教金鐘罩應允走
散那年九月裏我找到深州地方與劉玉隴撞遇

邀我到尙洛載家裏他們兩人向我學金鐘罩劉
玉隴已經學會尙洛載並未學會十六年四月劉
玉隴到我家裏說起他曾坐功運氣能出元神知
過去未來的事跟他學習的人甚多叫我也跟他
學習我就應允劉玉隴燒香我向上磕頭劉玉隴
叫念訣是道由心學心向家傳香焚玉爐心存帝
前仙佩臨軒靈陳官告竟達九天還念真空家鄉
無生父母現在如來我祖速至四句又教我打坐
運氣我問他的師父是誰他說是饒陽縣人朱玉
並沒說出住何村莊劉玉隴說這教名爲如意門

見人稱爲在裏二字就知是同教他徒弟共有多
少是何名姓並沒向我告訴就說每月每人送他
小禮錢三十文每季送他大禮錢二百文十九年
四月十八日臨清州廟會我在浮橋口做麵餅賣
十九日劉玉隴從我家裏找去悄悄向我說邪教
拏得嚴緊近處難以存身要到江南海州私鹽窩
裏藏躲我問他海州有認識的人嗎他說有同縣
的魏洛有去過幾次認得海州西關的私鹽窩子
頭兒李八大王王三標子又有山東莘縣河店村
監生蘇洛南常到江南販賣硝磺魏洛有與蘇洛

南相好如今他跟魏洛有蘇洛南同去投奔李八大王們向我要借盤費我給了他二百錢盤費走了至安平縣人張五也跟我學過金鐘罩等語查前據張五供稱魏洛有向伊告知劉玉隴邀其至安徽無爲州販賣私鹽郭洛雲供稱劉玉隴跟魏洛有等至江南海州私鹽窩子藏躲地名下符復提張五訊問據供劉玉隴究往何處伊本不知確切前因魏洛有向伊告知有劉玉隴邀其赴無爲州販私之語是以照此供吐等語臣伏查劉玉隴係次要逆犯運氣學拳傳徒煽惑頗有聲勢實爲

次要中之要犯茲據郭洛雲供出該犯踪跡自應
嚴拏重辦不可一日稽誅江南海州本係產鹽之
地郭洛雲供稱劉玉隴向其告知跟隨魏洛有等
赴海州西關投奔私鹽窩子又有頭人李八大王
王三標子等綽號恐又未必肯僅於窩藏更關緊
要查海州離清江浦較近兩江總督百齡此時正
當在彼防汛臣一面派員將郭洛雲嚴押送交百
齡以便密派幹員卽帶郭洛雲作眼馳往海州查
拏劉玉隴等務獲一面飛咨山東巡撫在該犯等
應行經過地方派人堵拏其販賣硝磺之蘇洛南

亦有關係與教郭洛雲學習拳棒刀鎗之尙際亭
馮世禮亦應查拏據供尙際亭業已身故馮世禮
一名務獲訊究臣仍嚴飭深州暨饒陽縣嚴拏尙
洛載朱玉務獲解訊再祝現等各犯現在嚴催各
屬文武員弁實力躡緝謹

奏

容安謹按此奏准軍機處知會已有

旨交兩江總督百齡查辦

嘉慶二十年六月二十二日

奏爲遵

旨委員緝拏要犯先行恭摺覆奏事竊本月二十一日承
准軍機大臣字寄嘉慶二十年六月二十日奉

上諭百齡奏拏獲逸犯張洛焦訊據供稱嘉慶十八年八
月間離卦教頭施老頭子令劉玉隴約會該犯糾人定
期赴曹州府滋事伊叔普光與路老賓先往該犯隨後
糾約張紹五孫老太史廷凡李老琴史老均等攜械起
身途中聞伊叔普光已在曹縣動手該犯等卽奔曹縣
途遇官兵追趕該犯左腿被鎗戳傷旋逃往南宮縣橫
河丁復旺家躲避十二月底聞伊叔普光亦逃回平鄉
祖師廟該犯往見知普光等於定陶打敗後投奔滑縣

與施老頭子馮克善會合屯在縣城西山隈裏被楊總兵鎗礮烘散施老頭子左眼被鳥鎗打傷劉玉隴左腿也被鳥鎗打傷俱逃往山西十九年冬間該犯往平鄉縣祖師廟去見普光施老頭子劉玉隴都在那裏說從平山縣北獨山口來還要回去今年正月初六日該犯又見普光說施老頭子等還在獨山口李合真處等語施老頭子卽施悅銘與劉玉隴等糾夥赴曹州府滋事經官兵剿敗後逃往陝西旋回直隸平山縣城北獨山口三教堂李合真處潛匿本年正月內尙在該處著那彥成卽選派妥幹員弁星往平山縣地方將施老頭子

劉玉隴李合真三犯查拏務獲嚴究祝逆等下落由驛具奏其隨同滋事之張普光路老賓史廷凡李老琴張紹五孫老太史老均張老廣等一併分飭緝拏勿任一名漏網獲犯訊供後先行由驛覆奏其百齡訊出僅止入教並未從逆籍隸威縣等處之于老多裴得興等十名及張洛焦之徒並未入教之趙志國一名概無庸查拏此時所拏者均係從逆之犯非拏習教之犯該督卽分別辦理可也各犯年貌住址單著抄寄閱看欽此伏查單開劉玉隴張普光路老賓三犯

臣

於本月十

三日接准百齡咨會委員拏獲張洛焦到案訊據

供稱劉玉隴在直隸正定府西南三十里舖小莊
上居住張普光在直隸平鄉縣北關祖師廟當道
士路老賓在直隸南和縣東北鄉邢家灣開糧行
生理當經臣密委幹員分投馳往緝拏現據平鄉
縣知縣翟慎行稟報該縣因復查保甲查至北關
真武廟內見一道士據稱名張普光該縣聽其言
語並非土著帶回署中訊問據稱山東冠縣中心
集卽于集人年六十七歲俗家只一胞姪張洛焦
伊於乾隆四十三年在河南閭鄉縣觀音堂出家
後在陝西河南湖北雲遊並無一定佳處嘉慶七

年始到平鄉縣北關眞武廟住持伊姪張洛焦來
看過兩次並沒久住伊與劉玉隴並不認識與邢
家灣之路老賓係屬相識等語核與飭緝之張普
光名姓年貌相符現交委員解省審辦等情又據
任縣知縣趙克鎰稟稱邢家灣係該縣所轄該縣
接准南和縣關會當卽馳赴該處將路老賓拏獲
據供曾入鉅鹿縣民李景幅大乘教後經出教於
嘉慶十六年間經前任任縣莊詠拏獲解省訊明
取結保釋現在解省審辦等情卽經臣委員迎提
尙未到省惟劉玉隴一犯未據報獲茲奉

飭發各犯清單劉玉隴不在正定府三十里鋪小莊居住
在平山縣城北獨山口三教堂內潛匿臣遵卽派
委幹員星夜馳赴該處務將劉玉隴施老頭子李
合眞拏獲其住居威縣之史廷凡李老琴張紹五
史老均住居曲周縣之孫老太原籍深州現住山
東臨清州浮橋口之張老廣等各犯亦卽分派安
員飭令馳赴各該處會同地方官不動聲色嚴密
查拏務期按名就獲不許稍有縱漏仍俟獲解到
省訊取確供并嚴追逸犯祝現等實在下落密拏
由驛具奏謹

奏奉

硃批嚴審速奏若有附京藏匿之犯由四百里速奏

嘉慶二十年七月初五日

奏爲委員拏獲史老均張朝武二名仍飭嚴緝施老頭

子等務獲事竊

臣欽奉

諭旨飭將施老頭子劉玉隴李合真三犯查拏務獲其隨同滋事之張紹五史老均等一併分飭緝拏欽此當卽奏明遴委幹員星夜馳往平山縣等處分投密拏去後茲據委員候補知縣何繼志會同平山縣知縣楊廷荃稟稱檢查保甲村莊底冊並無獨山口

之村亦無三教堂之廟飭取所存道士名冊僅有
李合勤住居距城九十里之太寧觀訊據供稱李
合勤住持該觀師名閻本奉早經病故徒弟二人
均止十一二歲並不認識施老頭子劉玉隴李合
真等詢之隣佑地保僉稱李合勤向無李合真之
名平素不見有與外來匪人交往等語搜查廟內
並無違礙經卷不法字跡並查該道人面上無麻
與單開年貌不符當卽保釋訪得該縣相距一百
餘里有天桂山廟宇十餘處彼處道人姓名內有
李合心李合修李合敬等名字卽日前往確查等

情又據委員西寧縣知縣高蕪業會同威縣知縣
陳念祖稟稱弔查保甲冊內第三口莊石廷璠訪
係史廷凡李純儒訪係李老琴石顯義訪係史老
均其南裏村冊內有名張朝武音同字異似卽係
張紹五隨分赴各村將張朝武石顯義卽史老均
拏獲訊據供稱均與張洛焦素相認識伊等並無
習教爲匪等語查張朝武等旣與張洛焦熟識自
應解省審辦並在張朝武家查起大乘經一本高
王經一本金剛經一部地藏經一套太陽經一本
觀音經一本焰口經一本清解經論一套經內並

無違悖字樣又起獲梢子棍一根鐵手鞭一根木
鐃一對一併解省惟石廷璠卽史廷凡先於本年
正月十六日外出傳訊鄉地隣佑僉稱並未回家
李純儒卽李老琴亦於本月二十一二日出外傭
趁俱無一定下落遵檄上緊查拏稟報前來臣伏
查平山縣城北雖據查明並無獨山口之村亦無
三教堂之廟現經訊釋之李合勤亦與單開年貌
不符但旣據訪聞天桂山各廟有道人李合心李
合修李台敬姓名或卽係李台真藏匿其中或李
姓又以合字排行亦可向各該道士查詢李台真

下落當卽明白指飭趕緊密查務期拏獲李合真
卽可將施老頭子劉玉隴等弋獲至石顯義卽史
老均張朝武卽張紹五二名均係單開隨同滋事
之犯仍飭臬司催提到省同先經拏獲之張普光
路老賓二犯研鞫確供並嚴追逸犯祝現等實在
下落謹

奏奉

硃批知道了

嘉慶二十年七月十八日

奏爲准咨飭訊奏

聞事竊臣前經拏獲教令劉玉隴學習金鐘罩之郭洛雲到案訊據供稱劉玉隴有赴江南海州私鹽窩子藏躲之語當將郭洛雲解交兩江總督百齡委員帶同作眼馳往海州查拏一面奏蒙

聖鑒嗣百齡將張洛焦拏獲究出嘉慶十八年八月間有離卦教頭施老頭子令劉玉隴約會張洛焦糾人定期赴曹州府滋事張洛焦之叔普光與路老賓先往張洛焦糾約張紹五孫老太史廷凡李老琴史老均張老廣郭洛雲等起身途中被官兵追趕逃散普光等亦被打敗十九年冬間張洛焦至平

鄉縣祖師廟內見普光向伊告知施老頭子劉玉隴在平山縣獨山口李合真三教堂內藏匿奏奉諭旨飭令臣派員查拏臣隨將普光路老賓張紹武史老均先後拏獲飭司審訊惟平山縣境內並無獨山口地名亦無三教堂并施老頭子劉玉隴李合真踪跡節經繕摺奏

聞嗣又據威縣將孫老太拏獲其張老廣一名查明卽係前經饒陽縣拏獲供出劉玉隴等去嚮之張五復經飭令臬司確究在案茲臣接准百齡咨會郭洛雲業已押解到江提訊之下郭洛雲不認從逆迨

提張洛焦訊問始猶狡展繼令郭洛雲面質張洛焦卽俯首無辭自認伊被郭洛雲藐視并斥伊係無賴有張老廣欲拜伊爲師又被郭洛雲阻止後張老廣送與郭洛雲馬匹等物伊心懷妬恨因而誣扳其前供聽糾滋事之周江張紹五孫老太史廷凡李老琴史老均王賢鈞曹第三伊雷張第三周廷傑張老廣孔得閑等暨蘇洛南父子均因挾嫌扳害該督因張洛焦前供誣妄前次咨會臣飭緝之普光等自必已經提到奏明將張洛焦解回直隸質訊辦理并將郭洛雲暫留江蘇作眼以便

質認劉玉隴等情抄錄奏稿供單咨送前來臣查
張洛焦初供該犯於十七八歲時拜河南武安縣
谷山黃姑菴道士施老頭子爲師入離卦教施老
頭子用手指在該犯腦後搓摸並將符水給飲該
犯腦後發癢就有月牙式一塊疤痕不長頭髮其
語已涉不經且前准河南巡撫咨會查明武安縣
並無谷山惟鼓山地方有黃姑菴一座業已倒塌
並無道士施老頭子其人嗣張洛焦供稱普光向
其告知施老頭子劉玉隴在平山縣獨山口李合
真三教堂內藏匿現經臣委員查拏平山縣地方

不但並無施老頭子踪跡兼無獨山口之村亦無
三教堂之廟又據張洛焦供稱十八年九月十二
日該犯被官兵鎗扎左腿先後逃至山東陽穀縣
素識之何丁氏家並直隸南宮縣橫河地方伊妹
夫丁復旺家躲避到臘月初間聽說事已平靜方
敢回家十二月二十二日聽得伊叔普光逃回平
鄉該犯去見普光向該犯告訴伊等在定陶打敗
後就投滑縣同施老頭子馮克善會合一處因官
兵攔住不敢進城卽在滑縣城西山隈屯住被楊
大人用鎗礮打散等語查滑縣係十八年十二月

初十日始行收復張洛焦供稱臘月初間聽說事
已平靜已屬舛錯且滑縣城外一望平原張洛焦
供稱施老頭子等在城西山隈屯住亦屬不實其
前供聽糾滋事之郭洛雲等十四名及蘇洛南父
子現經百齡等訊明係屬誣扳而施老頭子等數
名則又稱實有其人以上各情節據張洛焦供稱
皆出於普光之口普光業經臣飭屬拏獲解省張
洛焦所供是否屬實一經質對不難虛實立分惟
劉玉隴一犯張洛焦始則供稱住在正定西南三
十里舖西邊二三里小莊嗣又供稱在平山縣獨

山口李合真三教堂內已查明均無踪影今張洛
焦又稱前供住居正定西門外三十里小莊之劉
玉隴實叫劉雲隴前於被獲時傳說劉玉隴係奉
旨飭拏要犯若能拏獲可以得賞免罪遂憶劉雲隴曾與
施老頭子等在滑縣打仗受傷雲玉二字轉音相
似故到案卽供希冀邀功免罪劉雲隴曾於十六
年間到該犯家內該犯借隣人韓五之屋與之住
宿一夜等語查張洛焦前節次供稱皆係劉玉隴
今經郭洛雲質證忽又改名劉雲隴該犯以音韻
相似之字故爲改易正其狡詭之伎倆此外供情

罅隙甚多必應逐細研究臣現已飛行臬司一俟

張洛焦解到卽先行嚴切根究然後再提普光質

對以杜串捏如果供出要犯下落卽一面委員查

拏一面稟報

臣

核奏不任稍有縱延再前據委員

候補知縣何繼志等稟稱平山縣天桂山地方有

廟宇十餘處該處道士有李合心等名字前往確

查等語當經

臣

奏明一面飭查去後茲據稟稱天

桂山上有廟數處內有一處係儒釋道三教神祠

康熙年間建修廟內有道人李合敬李合心二人

誦明俱係平山縣人年皆三十一歲與劉玉隴並

不認識亦不知有李合真其人伊等廟內尙有道士李合修一名赴地看管莊稼等語并據道官霍合明出結具保詰問李合敬等因何俱以合字取名與李合真同一合字排行據李合敬等供稱伊等道教有道德同元靜真常守太清一陽來復本合敦永元明二十字傳流取名想李合真亦係合字輩分致與伊等相同等語已據該委員等將李合敬等省釋謹

奏奉

硃批嚴審確情勿因怒而濫刑轉失實在情節矣

嘉慶二十年七月十八日

奏正在拜摺間接據臬司盛泰稟稱連日督同保定府知府阿霖將張普光等六名隔別研訊據張普光供稱山東冠縣千集人年六十七歲乾隆四十三年間在河南閿鄉縣觀音堂拜道士師來明卽施老頭子爲師出家施老頭子本姓師並不姓施師來明平日極其安分且年老之人並不使弄拳棒嘉慶七年間伊在平鄉縣北關真武廟住持九年六月間師來明從河南到彼留住一月伊姪張洛焦亦至廟內與師來明見過師來明旋往西南一

路雲遊自此以後總未見面不知存亡下落如果
師來明至今尙在其年應已在九十上下伊並無
習教從逆等事伊姪張洛焦平素賣拳弄棒甚不
安分伊屢向斥罵禁止想必因此挾嫌誣扳願與
質對伊亦不認識劉玉隴李台真其人又訊據路
老賓張紹五史老均孫老太張老廣等五人僉供
亦無習教從逆之事皆被張洛焦挾仇誣扳亦求
質對等語該司現在欽奉

諭旨著親提張普光路老賓先行審訊俟張洛焦解到再
令質對已委員前往迎提等情稟報前來

臣

查張普光

等現供被張洛焦挾仇誣扳情節均與百齡所訊
張洛焦供詞相同是張普光等被張洛焦挾嫌扳
害已屬明甚惟劉玉隴一犯實在下落張洛焦始
終總未供吐今又改稱從逆之犯係劉雲隴而非
劉玉隴又扳一不知存亡之年老道士師來明又
改其姓爲施且捏造他名種種狡猾反覆臣反疑
其必係明知劉玉隴踪跡不肯據實供吐因而故
捏音韻相似之名信口搪塞以便劉玉隴日久潛
藏其情殊爲可惡臣現飭盛泰速催委員迎提張
洛焦來省與張普光等質對明白後再向張洛焦

嚴究劉玉隴實在去嚮藏匿何處卽時嚴拏務獲
不得任其狡延如有要供卽由該司速行具奏謹
奏奉

硃批覽

嘉慶二十年九月初五日

奏張洛焦一犯已解至直隸適張普光於七月十九日
已在省監病故經臬司盛泰提同路老賓張紹五
史老均孫老太張老廣等質訊張洛焦俱認仇扳
詰其有何深仇則稱或因索借不遂或因鄙薄伊
拳脚平常以致生意淡薄是以挾恨誣扳均與江

省所審相符臣查此等微嫌何致以習教從逆重
罪誣陷多人所供殊非情理至朱紅桃宗鬍子如
何同住樓觀臺尤爲關係緊要據供師老頭子原
係陝西塾屋縣樓觀臺道士伊所素知張普光係
師老頭子徒弟嘉慶五年伊往黃姑菴探望師老
頭子談及川楚教匪師老頭子以聞有牛八名朱
紅桃白蓮教劉之協等推爲教首造反之言答覆
前在江南問官向訊可認識反叛頭朱姓名叫朱
現其人伊答應不識朱現惟知朱紅桃曾經劉之
協推爲教首問官聲稱劉之協係已往之事旣知

朱紅桃卽向伊追究下落伊畏審捏稱在樓觀臺
與師老頭子同當道士並捏稱朱紅桃法名本印
又嘉慶二三年間張普光在臨清州西玉皇廟住
持有師老頭子師弟范鬍子在彼住宿一夜伊曾
會晤前因問官向訊認識宗鬍子與否伊答應不
識宗鬍子惟認識范鬍子又問宗鬍子造反與否
伊因已誣扳師老頭子造反遂混供宗鬍子造反
其實伊並不知有宗鬍子其人嗣又提到路老賓
供出之劉二丫頭卽劉文章據張洛焦供認卽係
伊在江南錯指之劉玉隴因被郭洛雲質證復捏

係劉雲隴追提道士高合真到案據張洛焦供認
卽係伊所供之李合真前係錯記其姓詰問高合
真等如何習教從逆則稱均係畏審隨口混指節
經臬司督同委員錄供稟核臣以該犯張洛焦前
在江南所供一一如繪今經提同路老賓等質審
非供爲挾仇誣扳卽稱係畏審混認臣萬不敢稍
存子虛烏有之見俾該犯得以狡遁至如師老頭
子高合真路老賓與該犯並無夙嫌伊叔張普光
僅止斥罵何致誣稱教首陷爲逆黨更屬不近情
理屢經駁飭另審案內先後提到之路老賓等十

餘名均因張洛焦已經認誣遂卽隨聲附和而張
洛焦狡猾異常供情反覆又因由江解直晝夜熬
跪雖未稍事刑求究亦時露委頓誠恐加以嚴鞫
或致不能支持轉難得其確供察該犯狙詐之私
總因張普光業已監斃師老頭子又未獲案是以
堅執不移訊據高合真劉二丫頭及現在提到之
張剛僉稱十七年六月以後師老頭子卽未來直
或仍往陝西墊屋縣一帶等語是師老頭子似有
其人亦似竟在陝西臣業經飛咨陝西撫臣密飭
查緝一面逐層檄司隔別詳細研訊謹

奏奉

硃批覽

嘉慶二十年十二月十七日

奏爲遵

旨再加詳鞫秉公定擬具奏事竊照江南陝西等省先後
拏獲張洛焦師來明卽師老頭子等一併解直質
訊究辦一案查此案先經直隸饒陽縣訪獲曾從
在逃次要逆犯劉玉隴學過拳棒之張五供出劉
玉隴係從郭洛雲學會金鐘罩郭洛雲係張洛焦
之徒迫獲郭洛雲與張五俱稱劉玉隴逃往江南

地方潛匿並訪知張洛焦亦已搬往蕭碭等縣居

住當經

臣錄供

奏明知會江南查拏一面將郭洛雲解往作眼躡緝旋經江南拏獲張洛焦供有聽從師來明卽師老頭子與伊叔張普光等糾邀同教助逆情事連張五郭洛雲均係逆黨嗣郭洛雲解抵江南質審復據張洛焦供稱所指習教從逆之人均係仇扳及陝西拏獲師來明據供本身並未習教從逆惟指稱張洛焦等二十餘人俱係離卦教犯江南陝西兩省先後具

奏將郭洛焦師來明解直質訊臣於張洛焦師來明未

經解到之先及解直之後陸續拏獲供出犯證張

普光路洛賓高本和劉二了頭張剛張朝武石廷

璠孫老太丁第四石顯義裴致學趙鵬舉王曰魁

王曰先李本仁李合祥解雙等十七名并據山東

河南兩省獲解來直之韓五王賢鈞張九三名節

經督同司道府等分別熬訊內惟路洛賓高本和

劉二了頭張剛王賢鈞供認曾習離卦教張五張

朝武石廷璠孫老太或認曾習金鐘罩或認曾習

拳棒均無從逆情事其餘一千人等俱供係安分

良民質之張洛焦師來明據稱張洛焦之在江南
所供教犯多名非係挾嫌妄扳卽係隨口混供師
來明之在陝西亦係因年老畏審順照張洛焦所
誣信口妄指出因查張洛焦在江南供認聽從師
來明糾衆助逆各情節歷歷不諱卽師來明在陝
西供出離卦教內之人核與張洛焦在江南供指
之人多相吻合似非捏妄乃一經解直提同供出
各犯質審均各全行翻易推鞠並不敢稍遺餘力
誠恐各犯供情狡黠難憑或有縱漏關係匪輕隨
卽奏請解部質究欽奉

諭旨嚴行申飭飭令再加詳鞠秉公定擬具奏欽此正在
審辦間又准山東撫臣委員解到周江范老希周
添崇金起曾伊第三曹老利焦老健蘇懷林等八
名臣督率承審各員並不稍予以暇致令與張洛
焦等見面立即隔別提訊據周江等均極口呼冤
僉稱平日並無習教不法情事或係張洛焦曾向
索借未給或曾將張洛焦驅逐致被挾嫌誣陷復
提張洛焦師來明同前後獲到一千犯證遵

旨秉公逐細研鞫緣張洛焦籍隸山東冠縣先當道士乾
隆四十七年從伊姊夫王曰魁之故兄王曰恒學

會拳棒並推拏治病醫道五十八年又從河南杞縣于家莊人張懷錦學會金鐘罩卽在各處耍拳傳徒漁利嘉慶五年復從現獲之同縣人王賢鈞習離卦教念誦真空咒語嗣因王賢鈞常向斂錢隨不習教張洛焦之叔張普光先在山東臨清州等處當道士住廟後又回至本村三官廟並直隸平鄉縣北關真武廟住持陸續收有山東冠縣楊胡村人金本印臨清州人李本仁直隸平山縣人高本和張剛威縣邵固村人王曰然等爲道士徒弟高本和係張剛引進普光在臨清州住廟之時

張洛焦前往探望會遇普光之師山西平遙縣人
師來明熟悉拳棒兼能行醫並看風水師來明見
張洛焦會弄拳棒遂以陝西樓觀臺有道士范宗
鬚子亦會拳脚之言向張洛焦告知並因高本和
原名合真以其係普光之徒字派不對與之改名
本和十四年冬間鉅鹿縣大乘教孫維儉等由曲
阜回家路過張洛焦所住村內地保見孫維儉等
來厯不明欲拘執送官經張洛焦勸止後往探孫
維儉因此與其同教任縣人路洛賓認識十六年
閏三月內普光令正定縣十里舖人劉二丫頭託

張洛焦轉尋師來明與劉二丫頭之母舅白臘月
醫治風癱病症時張洛焦無暇往尋欲借隣人韓
五房屋留劉二丫頭住宿韓五不允劉二丫頭卽
在張洛焦家住宿一夜而回後張洛焦至河南武
安縣鼓山黃姑菴找獲師來明偕至劉二丫頭家
看病師來明卽順便至平山縣一帶化緣修廟經
高本和張剛等請同募化得銀數兩師來明因黃
姑菴香火甚微欲教書餬口與張剛相商張剛薦
與親戚解雙訂其來年至家課讀子姪而同十七
年正月普光之徒王曰然將子王大小並年甫及

笄幼女王六妮託師來明帶往平山尋覓工做並
與擇婿是年三月內王六妮同解雙家婦女在村
觀劇被村人劉考等譏諷解雙之父解萬明不依
劉考等將解萬明毆傷解雙同家親戚赴平山縣
控告經官分別杖責飭逐師來明帶同王大小王
六妮出境便道至劉二丫頭家住宿一夜仍回黃
姑菴是年六月師來明各自回歸原籍平遙縣張
洛焦木係在各處賣拳行醫餬口旋因常被從學
及素習拳棒之人鄙其技藝平庸因此未能獲利
十八年卽同子張白小在家做賣煎餅度日十九

年五月內張洛焦因本處荒旱遂往江南蕭縣地方賣藥治病二十年三月內復攜帶妻子同往江南就食五月內被碭山縣拏獲以其如果認識滋事教匪劉玉隴即可帶同作眼獲犯必有重賞之言向詰張洛焦希圖混食貪賞遂將現識之劉二丫頭誤指爲劉玉隴捏稱認識經兩江總督委員嚴究其是否共知逆情張洛焦畏審卽隨口混供曾經師來明令劉玉隴約伊與普光等糾黨滋事並將素所耳熟之同教人及拳棒教師暨挾有嫌隙之人一併隨口編捏誣扳而師來明於十七年

六月回籍後十八年六月因與族人師紹長爭地
涉訟經地方師化其調處和息後遂至河南閩鄉
縣大字營往找素識之姚居雲留在彼行醫製
賣膏藥並在范思禹家教書一年二十年正月又
經素識之鮑幅元保薦至南古董村真武廟住持
六月內因閩鄉縣編查保甲師來明因已查過疑
係道會司曹嘉真圖詐不允造入保甲冊內經曹
嘉真稟縣師來明恐受訟累逃至陝西華州移山
廟八月內被獲經官將張洛焦在江南所供離卦
教內之人逐一指名向其嚴究師來明因年老熬

審難受亦卽隨口妄供現將張洛焦師來明先後
在江南陝西供出一千人等獲案一一與張洛焦
質對無不向張洛焦當堂指斥噴其妄扳拖累聲
色俱厲而師來明尤爲忿極呼冤張洛焦慚汗交
流俯首無詞細核案情張洛焦在江南所供十八
年八月初一日師來明令劉玉隴約會該犯糾人
助逆伊叔普光同宗鬍子路老賓等先至曹縣滋
事伊於九月初一日與周江等十餘人隨後奔往
曹縣等語今則據稱十八年八九十等月係在家
與子張白小賣餅生理業經山東傳到其隣人韓

五查訊供情吻合而師來明與未獲之宗鬻子卽
范宗鬻子亦經河南查獲十八年八月均係在閩
鄉縣住廟直至十九年九月及二十年六月始行
他往張普光又於張洛焦師來明未經解直之先
已到案供明伊與師來明均係素當道士並未習
教十八年六月伊係在雄縣徒弟李本仁所住廟
內八月底始回平鄉路過任縣缺乏盤費曾向路
老賓借用錢文提訊李本仁等供亦相符是十八
年當教匪滋事之時張洛焦等均未出門確有證
據其爲張洛焦前在江南所供情節係屬混認妄

扳毫無疑義且現復究詰至再有僅認從前曾經
習教實未從逆亦有堅供向無習教不法等事均
各矢口不移案無遁飾至追究各逃逆下落據各
堅供向不認識實無知情容隱情事查例載誣告
叛逆被誣之人已決者誣告之人擬斬立決未決
者擬斬監候又例載邪教案內爲從改發新疆給
額魯特爲奴又例載游手好閒不務正業之流自
號教師演弄拳棒教人及投師學習者一經拏獲
將本犯杖一百流三千里各等語此案張洛焦旣
素會拳棒金鐘罩法并曾習離卦教本非安分之

徒因在逃之次要逆匪劉玉隴亦會金鐘罩是以
將其緝獲根究該犯希圖作眼跳緝混食貪賞輒
將認識之劉二丫頭誤指爲劉玉隴及究其是否
共知逆情又復畏審妄認從逆并膽敢挾嫌仇扳
多人甚至將伊期親胞叔張普光誣爲教匪逆黨
以致張普光拖累來省監斃卽與誣告釀命無異
自應照誣告叛逆之例從其所犯重者治罪張洛
焦一犯除邪教爲從演弄拳棒教人各輕罪不議
外合依誣告叛逆被誣之人未決者斬監候例擬
斬監候該犯誣陷胞叔致監斃在獄情罪較重應

請

旨卽行正法以昭炯戒師來明屢訊堅供實無習教傳徒
不法等事卽素會拳棒並未演弄教人其在陝西
供情不實亦係因張洛焦業經誣指年老畏審無
奈隨口混供情有可原且現在年已七十應免置
議遞回山西平遙縣原籍取保安插勿許再行出
外游蕩路洛賓高本和劉二丫頭張剛王賢鈞等
五犯俱供認曾從習離卦教久已改悔第此次教
犯未便容留在籍應均照邪教爲從發遣例改發
新疆給額魯特爲奴照例刺字張剛王賢鈞已於

訊供後在監病故應毋庸議張五張朝武石廷璠
孫老太等四犯均供認曾習拳棒並非安分之徒
亦應按例問擬俱合依演弄拳棒教人及投師學
習者杖一百流三千里例各杖一百流三千里至
配所各折責四十板張朝武孫老太亦已於訊供
後在監病故亦毋庸議已故之張普光與韓五張
九丁第四石顯義裴致學趙鵬舉王曰魁王曰先
周江曹老利周添崇蘇懷林伊第三金起曾范老
希焦老健等均訊係被誣向無習教不法等項情
事應與訊係無干之李本仁李合祥解雙均予省

釋至未獲最要次要各逆匪屢經嚴飭各屬並密
派文武員弁分路設法訪緝不敢稍有疎懈現復
諄飭加意上緊偵緝務獲解究以絕根株供招咨
部謹

奏奉

硃批刑部速議具奏

嘉慶二十一年二月初九日

奏爲拏獲次要逆犯劉玉濤恭摺具奏事竊查刑部單

開次要逆犯劉玉濤一犯

臣

前在軍營審訊敎匪

稔悉該犯係與林清李文成牛亮臣馮克善互相

勾結各爲一股在山東河南直隸等處分投倚角
響應黨與最衆聲勢最大前因日久屢緝無踪又
於審辦張洛焦一案悉心跟鞠亦無確線臣時刻
焦灼隨派員弁四出躡訪嗣據河間協右營守備
劉英魁四黨口守備李士剛稟稱訪聞山東樂陵
直隸宣津交界地方有劉汝榮其人教演拳棒繪
畫老虎售賣年貌與單開劉玉瀝相似臣卽飭該
弁等不動聲色先購該處附近村人杜連城設法
往探杜連城與其弟兄邀同宋宗祥等前往投拜
劉汝榮爲師學拳詢問該處隨同學拳之人均不

知係劉玉濫後因聽係饒陽人口音杜連城隨向
劉英魁李士剛告知劉英魁等卽囑杜連城等誘
拏李士剛一面馳至省城而稟臣因據該弁等風
聞該犯拳棒甚精膂力亦大且到處多有黨羽隨
添派都司劉經干總蘇國泰甘保哈振鰲馳往會
同擒拏旋於本月初六日據劉英魁等稟稱該弁
等商同杜連城宋宗祥等已於樂陵縣屬小宋家
莊將劉汝榮用酒誘飲乘醉拏獲交寧津縣訊問
先猶不肯認係劉玉濫再四騙哄已認明實係饒
陽縣人劉玉濫等情稟報前來臣添派員弁飛催

迎提來省因查從前緝拏劉玉滢之堂弟劉才在饒陽縣監禁又劉玉滢於十三年間屢在饒陽縣及保定府涉訟各該處衙役人等均與劉玉滢熟識當復飛檄饒陽縣知縣陳晉押帶劉才及縣役王亮義等星夜來省茲據劉英魁等將劉玉滢解到臣卽督同兩司道府將該犯提至當堂令饒陽縣快役王亮義清苑縣壯役崔紹會及劉才等認明實係次要逆犯劉玉滢隨向詰訊令將商同林清謀逆在外響應逃後在何處潛匿及要犯劉呈祥等六名現在何處一一供吐該犯輾轉支飾

惟認在大新莊伊師陳茂林家內學好運氣因聞
隣莊林清聚衆謀逆伊曾往探望一次並未從逆
並不認係何卦教首要犯六名伊惟識劉第五均
不知現匿何處伊曾會拳棒金鐘罩於十八年九
月間由饒陽縣逃至山東樂陵縣屬之張五才莊
有莊民呂亭獨自一人開設牌局伊卽改名劉汝
榮在呂亭家長住就在附近賣演八卦拳繪畫老
虎賣錢度日並未逃往何處亦未回至饒陽本村
伊與董棚太亦不認識等語詰以旣未從逆何以
於十八年九月間逃後並不回家該犯無可登答

惟稱係因被林清牽累訊以如何牽累反覆開導
果能將劉呈祥等六名現在藏匿處所指出拏獲
必當格外寬貸免其磔戮詎該犯神色毫無改動
談笑自如僅稱死亦不怨實不知伊等逃往何處
亦無與林清商同謀逆情事臣伏查劉玉濫一犯
據牛亮臣原供係離兌巽艮四武卦不知何卦頭
目臣與臬司盛泰在軍營審訊教犯僉稱劉玉濫
係一股大頭目與牛亮臣馬克善李文成等互相
應援今經設法獲案臣率同司道等竟日誘導該
犯一字不吐卽所供逃後僅在樂陵縣屬村人呂

亭家長住並不知伊係逆案要犯等語均係誑飾
究詰之下該犯毫無懼悔一味支展察其神氣竟
係拚死搪塞似此緊要逆犯斷無不知劉呈祥等
六名實在下落或竟勾同藏匿必係因恐據實供
出轉致全就殲誅是以甘爲抵死不肯供吐狡黠
之狀實堪髮指又未便遽加刑求臣卽當赴差查
道不能再延時日再四籌酌應請將劉玉濬卽劉
以元遇濬一犯解交刑部請

殊

旨勅下該部詳細研鞫確切供情並各要犯藏匿下落一
併究辦除遴派文武員弁將劉玉濬嚴行鎖鑰裝

盛木籠小心押解赴交刑部收審傳令沿途地方
官一併護送並將獲禁劉才等原案卷宗送部核
訊仍派幹弁馳往樂陵縣屬張五才村密拏呂亭
務獲送部歸案辦理謹

奏

嘉慶二十一年二月初十日奉

旨劉玉滢著交刑部歸案嚴訊

嘉慶二十一年二月十三日奉

上諭昨據那彥成奏拏獲次要逆犯劉玉滢解京審訊茲
據刑部審明劉玉滢實係飭緝正犯那彥成督緝認真

所有伊任內奏事時不將緝捕情形聲敘降三級留任
遲孫氏控案並未親提審訊又不附奏緝匪情形併案
降三級留任同子伯克過境未派道府大員護送降二
級留任三案處分俱著加恩開復其訪明劉玉濇踪跡
設法擒擊之河間協右營守備劉英魁著開復遊擊原
官四營口守備李士剛著以都司陞補均先換頂帶協
同獲犯之宣津縣知縣傅德臨著交部議敘民人杜連
城邀同宋宗祥拜投劉玉濇爲師學習拳棒誘醉擒獲
杜連城著賞給把總並加賞藍翎宋宗祥著賞給額外
外委均令隨標學習以示獎勵該部知道

謹按嘉慶二十一年二月十九日

奏報饒陽縣知縣陳晉續獲劉玉澐供出之劉文通劉明堂杜洛上訊據供認聽從劉玉澐入坎卦教劉玉澐兩次誘伊從逆均未應允杜洛上供認雖與劉玉澐有親實不知劉玉澐有謀逆等事因在差次未及督率臬司研鞫請將劉文通三犯解部歸案請

勅部審辦奉

上諭劉文通劉明堂杜洛上俱著解交刑部歸案嚴訊二月二十六日

奏報大名縣知縣張菊擎獲劉玉澐供出之雷老金據供在山東樂陵縣認識劉玉澐並不知其係逆案要犯亦並不知祝現等下落向曾認識濮州飲馬川袁武魁現獲之館陶袁武魁伊並不認得等語卽飛飭委員前赴濮州訪查袁武魁以備研訊三月初三日

奏報署嶺縣知縣韓述葵續獲劉玉澐供出之逃住嶺縣張家店給人鑿磨之店家張抱訊據供認嘉慶十八年十一月曾聽得有一鑿磨人在已故張台所開歇店居住同店夥杜洛文睡宿月餘

並不知是逆犯又經拏獲杜洛文並張抱之姪
張如玉張七同村開設歇店之手振于默等據
供實無知情容留又查獲寧津縣容留逆犯劉
玉滌居住之蕭老文訊供係相識人夏四存牛
馬漢帶來借住並不知爲要犯相應將各犯解
部請

旨勅部提同劉玉滌質訊均奉

硃批刑部知道三月初九日

奏報拏獲牛馬漢訊據供認十三年在省與劉玉滌同
店居住因此熟識十八年十二月劉玉滌至伊

家聲言躲避伊心疑盤詰劉玉滢自認京城開
事有我名字在伊家兩日卽同夏四存將劉玉
滢送至蕭老文家借房暫住並無習教謀逆情
事請解刑部提同劉玉滢質訊奉

硃批刑部知道三月初九日

奏報拏獲袁武魁之父袁興邦訊供袁武魁已赴金鄉
趕會與祝現劉第五並不認識實無容留等事
請解交刑部提同劉玉滢質訊仍飭委員赴金
鄉訪緝袁武魁以備嚴究奉

硃批刑部知道

謹按嘉慶二十一年三月初九日

奏報據吳橋縣孔昭誠訪獲德州夥匪羅功供出給予
旗布之齊呈祥王垣等伊複製做旗布四十杆
轉給王泮張盛楊逢年馬淵等除張盛已爲德
州拏獲外王泮等均卽解省訊據王泮供認旗
布係震卦教匪宿元謀所給齊呈祥供認先後
拜李和修王垣爲師復將李和修拏獲訊供向
習龍天門教卽羅祖教羅祖分傳五支一在石
佛口王姓一楊宗彩一陳姓均不知何處一交
河劉姓一姓張在南城翠花衛衛供有佛堂每

年江南船幫致送香錢等語請

旨飭步軍統領查辦將李和修解交刑部一面嚴詰王垣等黨與奉

諭旨以訪獲夥匪旗布著嚴切根究務令據實供吐按名緝獲歸案審辦其翠花衙衛張姓已交步軍統領順天府密行查緝四月十二日

奏報奉

諭旨刑部奏李和修供詞內稱京中傳教張姓在翠花衙衛居住有佛堂係張姓親戚劉姓看守乃張盛向伊告述張盛先因收受羅功旗布案內前經緝獲奏奉

諭旨嚴加究詰嗣據供張盛係德州人已經德州拏去卽咨會山東巡撫將張盛解直歸案審辦奉

硃批刑部知道四月二十五日

奏報迎提張盛到案嚴訊據供認收受羅功旗布是實惟翠花衚衕張姓傳教一節狡供不認請將羅功等一案另結將張盛解部與李和修質審奉硃批刑部知道

嘉慶二十一年六月初三日

奏爲遵

旨審擬具奏事竊據派委緝捕之將備劉英魁等會同吳

橋縣德州訪獲散旗夥匪王垣等一案先經臣飛飭解省查明所起王垣家藥王像及尋常經卷均無違悖字跡當卽錄供具奏欽奉

上諭那彥成奏訪獲散旗夥匪解省審鞫緣由一摺此案羅功收受齊呈祥散給旗布並令楊逢年等照樣製就四十塊分給夥黨該犯所製旗布既有四十分則所散給者自必卽有四十人著該督親提現獲各犯嚴切根究務令將分受旗布之人據實供吐按名緝獲歸案審辦該督審明後卽按律分別定擬具奏欽此節經檄司督同首府嚴究夥黨務期按名獲案以淨根株茲

據保定府知府阿霖等審擬由臬司盛泰覆審解勘前來臣親提嚴訊緣王垣籍隸山西寄居山東德州曾與已正法震卦教內之景州人宿元謨認識十八年四月宿元謨勸令王垣入教隨拜宿元謨爲師傳授真空家鄉無生父母八字口訣是年九月初間宿元謨向王垣告述教匪將起得有旗布可免殺害宿元謨給與王垣白旗二塊上寫奉天開道四字俟教匪到日將尖角旗插於門首方旗插在婦人衣衿爲號並爲教匪燒茶煮飯可以保護身家王垣轉向素習清淨門教之齊呈祥告

知齊呈祥畏懼亦欲拜宿元謨爲師因未曾晤卽
拜王垣爲師入教亦授八字真言口訣王垣照樣
另製白旗六塊分給齊呈祥二塊魏幅生二塊尙
剩二塊留在家內齊呈祥亦另製旗布二塊轉給
道士羅功授以八字真言使其入震卦教羅功轉
向素好之馬淵楊逢年告知馬淵等畏死索旗防
身楊逢年出錢交羅功買布製旗四十塊馬淵楊
逢年照寫奉天開道字樣馬淵因有家口十三人
取去旗布十三塊楊逢年因有家口十二人取去
旗布十二塊羅功又分給素識之王泮二塊張盛

二塊孫起和三塊劉爽三塊王泮張盛孫起和均
各收受惟劉爽未曾留下迨馬淵楊逢年等帶旗
回家因聞官兵勦捕緊急先後將所得旗布送還
羅功羅功亦將家存旗布八塊及魏幅生所得齊
呈祥旗布二塊均各燒燬旋據王泮首告帶同作
眼陸續拏獲王垣等稟經臣奏明提省審辦欽奉
諭旨再飭嚴切根究節經檄司督同委員詳細研鞫臣復
提犯親審各供前情不諱恐該犯等或實有預先
勾結謀逆情事并分受旗布之人不止此數或另
有知情藏匿在逃各逆犯踪跡反覆究詰加以刑

嚇矢口不移案無遁飾查律載謀反大逆但共謀者皆凌遲處死知情不首者杖一百流三千里又犯罪自首者免罪又奉刑部審辦逆案十九年正月二十二日奉

旨情罪又次重人犯改爲斬監候欽此欽遵在案王垣先拜已正法之宿元謨爲師入震卦教嗣因宿元謨告以教匪起事給與旗布預備接應復另製旗布散給齊呈祥等齊呈祥羅功得旗入教亦卽照樣製旗輾轉分散嚴訊均尙無預先勾結共謀情事惟旣入教散旗卽屬逆黨核係在家未行情罪又

爲次重自應遵

旨定擬王垣齊呈祥羅功三犯除知情不首及邪教爲從
各輕罪不議外應遵照前奉

諭旨均擬斬監候秋後處決馬淵楊逢年魏幅生張盛訊
明俱未入教因齊呈祥羅功告知逆情心存畏死
僅止索旗防身旋因懾於兵威俱各送還與入教
助逆者有間馬淵楊逢年魏幅生張盛及例不緣
坐之羅齊氏五犯應俱依謀反大逆知情不首律
各杖一百流三千里至配所折責安置馬淵業已
在監病故應毋庸議魏幅生年逾七旬羅齊氏係

婦女均照例收贖迫取贖銀入官冊報張盛於取
供後因另案之李和修在刑部供出業經遵

旨解部同李和修質審現准部覆張盛業已病故亦毋庸
議劉爽當羅功告知邪教起事已知逆情不卽首
告惟尙未收受旗布應於馬淵等流罪上量減一
等杖一百徒三年該犯已在監病故亦毋庸議王
泮得受旗布現據呈首隨同作眼將羅功等拏獲
足以功罪相抵應照例免其治罪姚吉太訊明並
不知有散旗之事係羅功錯記誤供應免置議孫
起和飭緝獲日另結經卷等件案結銷燬供招咨

部謹

奏奉

硃批刑部議奏

嘉慶二十一年四月初三日

奏

臣

自前月二十四日回省以來正值辦理秋審

臣現

與臬司盛泰悉心酌核凡情實緩決可矜之案務期講求至當以仰副

聖主慎重刑章之至意至內控各案上年掃數辦結本年續到之案應奏者僅止四起現因人證未齊嚴檄催提未結咨案亦嚴催趕辦不使稍有積壓拖累

本年仰賴

皇上福庇暘雨應時麥收可期豐稔所有春徵錢糧民間

自必踴躍完納

臣

業已檄飭各州縣務須儘徵儘

解并面囑藩司隨時上緊提解不許存留屬庫以

杜虧挪最要次要各逆犯屢經

臣

嚴飭各地方官

并派出文武員弁實力躡緝并逐日嚴加飭催各

該員弁頗知奮勉據署撫寧縣知縣費元鑽訪獲

張滿等習天主教一案元城縣知縣楊本濬拏獲

逃流孟丁兒一案南路同知許嗣容拏獲逃軍谷

三一案萬全縣知縣潘光煒拏獲逃軍李曰輔一

案逃流冀振名一案盧龍縣知縣辛文止拏獲逃
流呂吉進一案威縣知縣陳念祖盤獲汪培瑋假
冒職官一案署饒陽縣知縣黃郁章拏獲張祥臨
學習天主教一案元城縣典史周達湘盤獲形跡
可疑人金鼎杜洪太一案署遷安縣知縣汪本稟
報喜峯口巡檢唐克寵會同外委王天寵拏獲董
懷信案內習教人張起臣等一案承德府知府嵩
齡稟報唐三營千總孟順拏獲形跡可疑道士李
泳照一案平鄉縣知縣翟慎行拏獲逆犯程士興
之子程拴一案署靜海縣王慶坨千總李棟樑拏

獲習教人秦有音一案大沽營都司郭義署海口
營守備劉國興武清縣知縣甘家春會同拏獲形
跡可疑人周長周幅一案宣化府同知馮桂芬拏
獲形跡可疑人李智一案河間協左營千總張起
鳳拏獲教犯趙庭樑之子趙明一案新雄營都司
余國柄新城縣知縣陳景登會同拏獲趙明供出
之韓麻子一案青縣汛千總藍自貴訪拏教犯張
森一案北路同知陳世相盤獲面生可疑人夏二
一案署天津右營守備張起鳳等拏獲面生可疑
人李三一案平泉州拏獲逃遁色布滕一案又拏

獲逃遣土魯博臺一案邯鄲縣拏獲逃遣郝三子
一案現均提審訊明後卽照例辦理此實悉由遵
奉

聖明指示嚴拏各要犯乃能將各地方學習邪教以及軍
逃人犯並皆搜剔俾良民得以安生從此以正人
心而端風俗皆仰承我

皇上飭法弼教之意閭閻故隱受其福臣仍嚴飭各員弁
等加意訪緝務期要犯畢獲以冀除莠安良仰慰

聖厯謹

奏奉

硃批逐案研究切勿草率從此跟追各逆犯下落一兩月內務獲勉之

嘉慶二十一年四月十二日

奏爲欽奉

上諭恭摺覆奏事竊臣於本月初十日承准軍機大臣字寄欽奉

上諭祝劉二逆在山東袁武魁家藏匿惟該省查拏袁武魁等犯業已月餘該逆等見搜捕嚴緊不敢仍留東省自必潛回直隸著那彥成卽派委委員在與山東連界之大名廣平一帶嚴密訪緝如能將祝劉二逆弋獲迨

非劉玉滢可比朕必立沛重恩加爵厚賞該督當勉之又勉也欽此又於本月十一日奉到

硃批祝劉二逆確在山東陳預只知研審袁武魁不能拏獲大逆今已匝月二逆遠颺實深憤懣汝力加振作盡孝盡忠多差員弁各處密訪如能拏獲立沛重恩廣庭墳園遣官告奠汝其勉之汝其勉之欽此臣跪讀之下曷勝感泣臣兄那彥寶亦遵

旨寄信到臣並諄諄囑咐務獲要犯以冀稍答

主恩臣伏查大名府屬與曹州府連界本有員弁在彼訪緝前聞祝劉二逆在山東藏匿誠恐該省搜捕緊

急潛入直境復添派文武員弁馳往查拏亦有自願前往躡緝并有改裝易服密赴東境緝拏者通計不下四十餘員茲臣欽遵

諭旨多派員弁分投馳赴大名廣平一帶毗連山東州縣
慎密訪緝毋論通衢僻道遇有從山東過來之人
逐一稽查盤詰不許稍有縱漏又思河間天津二
府屬亦多與山東接壤而山東德州浮橋渡口爲
行人往來必經之所景州爲入直門戶雖曾派遊
擊劉英魁等二十餘人在彼躡緝然當此搜拏喫
緊之時難保祝劉二逆不向北逃竄臣亦飭該地

方文武各官於交界處所密派兵役實力巡查又分派候補丞倅州縣多員馳往緝捕其德州浮橋渡口及景州入境之處多派幹員駐守盤詰并曉諭派出各員弁如訪問祝劉二逆在山東境內卽密往擒捕如遇山東官弁務須齊心協力設法擒拏期於必得其邀

恩賞斷不可稍分畛域及存攘功之見以致要犯走脫有悞大事轉蹈重咎現在南糧北上該逆等或改捏名姓復入糧船充當水手亦未可定臣飭令沿河州縣營汛一體留心偵捕仍飭本管鎮將道府認

眞督拏並通飭閩省文武一體加意躡緝仍密派
幹弁在船在渡嚴密緝訪茲奉

硃批訓勉至再至三並蒙

垂念先臣

恩許遣祭

臣

具有天良敢不以忠孝自勉竭盡犬馬之力

加意振作并鼓勵文武員弁嚴密訪拏以期要犯
就獲上慰

聖懷理合恭摺具奏謹

奏奉

硃批實心緝捕務期就獲佇待喜音立施厚賞

嘉慶二十一年四月二十五日

奏爲覆奏訪緝情形事竊臣於本月二十二日准軍機

大臣字寄四月二十一日奉

上諭前據那彥成奏所派文武員弁在山東毗連州縣躡緝祝劉二逆並改裝易服密赴東境緝拏者不下四十餘員後又添派多員分投偵訪等語祝劉二逆在山東潛匿自袁武魁等獲案後總未究出現逃去向那彥成派往員弁多人在東境豈一無聞見自必將近日訪緝情形隨時稟知那彥成乃未據該督奏及現在祝劉二逆或仍在東境或潛逃他處那彥成得有音信著卽據

實奏聞欽此

臣跪讀之下仰見

聖主宵旰廛注

訓勉諄切曷勝悚急之至伏查

臣

前經派出文武員弁四

十餘員截拏祝劉二逆後又添派多員分赴大名
廣平一帶毗連地方嚴密查拏並因河間天津二
府屬與山東接壤之處甚多又多派幹員四路盤
詰偵訪屢經嚴檄諄飭如訪有該二逆潛逃確實
去向無論在東在直均卽飛速稟知連日又經分
檄馳催緣所派武弁都守千把外委等官雖俱奮
勉認真訪緝但未經得有確跡不敢以空言具稟

丞倅候補州縣佐襍各員雖按日稟明躡緝處所
及購探情形究無確實蹤跡適據派出之已革知
縣儲斗南等先後稟報在山東邊界之營內拏獲
荷澤縣人畢闖畢祿畢學燕三名現在檄飭解省
審辦臣晝夜思維祝劉二逆如果潛回直省值此
四路兜截無論通衢僻壤水陸關渡在在均有員
弁改裝購訪斷難倖逃法網所有派往員弁咸知
齊心協力不敢稍分畛域人人思奮冀得渥荷

聖恩

臣

並密札山東撫臣陳預轉飭所屬地方官不論東
省直省一經得有二逆確音彼此飛行咨會惟已

屆月餘並無確實去向臣萬分焦灼莫能名狀仰
蒙

垂詢益切惶恐惟更加緊督催各路員弁務期鼓勇奮力
一得該二犯潛逃確音立即稟報以憑據實馳

奏上慰

聖懷謹

奏奉

硃批二逆形踪詭秘恐二袁之供未必確切仍須各處嚴
緝不可守株坐待勉之

嘉慶二十一年五月初八日

奏爲叅奏請

旨事竊

臣

接據正定鎮總兵張大振稟稱先據開州營都

司劉肇元稟報拏獲次要逆犯王萬秀一名當經
據情轉稟續於四月二十九日據派委緝捕之已
革把總張景龍帶領開州營兵丁常青等押解逆
犯王萬秀行抵正定該鎮傳詢常青據常青面稟
並非該兵訪知踪跡實係張景龍等帶領眼目訪
聞知會本營隨派該兵常青等五名前往協同拏
獲該營千總李國昇並未親身前往該營都司劉
肇元因辦差尙未回營該鎮據實稟請核懲前來

經臣伏查王萬秀住居西湖村亦名太平莊雖係

滑縣管轄但距開州營汛僅止數十里該營不能
預爲訪出已屬疎懈迨經委弁張景龍告知千總
李國昇卽當親身帶領兵丁會同往捕乃僅派兵
協拏並不親身馳往實屬膽玩該都司劉肇元旣
係辦差公出並未回營卽未親身前往原無不合
乃輒捏稟帶領千總李國昇等星夜往拏希圖邀
功實屬欺朦玩愒現當緝捕喫緊之時豈容此等
甚劣員捏詞朦飾若不從重懲辦無以儆懈玩而肅
捕務相應叅奏請

旨將開州營都司劉肇元千總李國昇均卽革職以爲各
營員弁不能實力緝捕者戒仍令劉肇元李國昇
在開州邊界一帶協緝要犯如果改悔出力能有
弋獲再行奏請開復分別辦理謹

奏

嘉慶二十一年五月初十日軍機大臣字寄奉

上諭本日那彥成奏都司劉肇元千總李國昇冒功捏
稟一摺已有旨將該都司等革職解部審訊矣昨據劉
鏞之等奏委員會同開州兵役緝拏逆犯王萬秀時該
處聚衆拒捕經該委員拏獲解州滑縣陳令以王萬秀

係屬良民親來索取恐有包庇情事當經降旨交該督確查覆奏王萬秀一犯現已到部正在研訊其當日就獲時開州地方營汛各員與滑縣陳姓知縣是否彼此爭功致相競奪著該督查明叅奏如查有滑縣知縣爭功情事卽咨明該撫將該縣押解刑部歸案審辦

嘉慶二十一年五月十四日

奏爲遵

旨查詢並將委員周邦憲張景龍及隨同緝拏之兵役解部事竊據委員周邦憲張景龍寄與任烜稟內稱該員等會拏逆犯王萬秀之時該處聚衆二百餘

人各執器械施放鳥鎗拒捕劫奪追獲犯解交開
州審訊滑縣知縣陳筠又同千總帶領多人車載
器械來州索要眼線等語欽奉

諭旨飭將周邦憲張景龍詳晰訊究並向開州知州陳晉
查訊獲犯情形欽此

臣

查王萬秀一犯先經接據開州

知州陳晉稟稱會同滑縣兵役拏獲因有該村民
人袁三袁四作眼指證王萬秀習教從逆核與單
開次要逆犯姓名相同當卽飛飭解省一面

奏請解部與董樞太質認旋據該州會營僉差兵役將
王萬秀押解到省

臣

檄司委員解部隨向周邦憲

張景龍等面詢東豫交界近日躡緝情形據稱該員等先在開州花園屯地方盤獲滑縣小王莊人高士義一名交開州審訊係拜離卦教郭明山爲師又訪拏滑縣太平莊人王萬秀一名不料該處聚集多人各持器械搶奪拒捕迨將王萬秀交州收審滑縣陳姓知縣遣人至州坐索又有百餘人將鄉勇蕭芳魁擡去陳知縣復會同千總帶領多人車載器械親至開州署索要眼線等語臣聽聞之下卽覺所稟不近情理因詰以該處如果聚眾劫奪伊等不過數人何以未經搶去伊在黑夜何

以亦未受傷至滑縣知縣干總均係職官何敢公然械鬪爭功卽使實有其事開州知州陳晉亦必與之爭執正可藉此見長有何徇隱瞻護何以匿不具稟周邦憲張景龍詞色支吾臣因該員等究係躡緝獲犯之員且王萬秀解省時業經飭府訊據供認聽從袁德建入教隨同搶掠對質屬實該員等所稟或係另有別情必須先向陳晉確切查覆方可得其虛實隨檄行開州知州陳晉據實稟報不可稍有徇飾一面諭令周邦憲張景龍聽候查辦並據該二員稟稱訪問滑縣各處尙有助逆

之犯請給劄會同開州往拏臣以緝捕正當喫緊之時准令給劄前往欽奉

諭旨令

臣

詳晰確究卽據開州知州陳晉稟稱前據州役

李玉林等隨同委員周邦憲張景龍拏獲滑縣被賊裹脅之高士義一名送州訊究滑縣知縣陳筠並無因該犯係屬良民帶領多人赴州索討之事高士義已遵批起解赴省至會同拏獲王萬秀一案因據委員張景龍告知王萬秀信息時因事屬機密未經知會滑縣卽於四月初十日會同委員帶同兵役密赴該村時值黑夜適滑縣知縣陳筠

先期派差在交界設卡緝匪隨一同至村將王萬秀拏獲王萬秀之兄王萬宗同人搶奪開州兵役與之相打將王萬宗隣人袁劉旺毆傷拏獲王萬秀回州旋准滑縣據王萬宗稟報伊弟王萬秀家夤夜被賊劫去衣服錢物將王萬秀架走王萬宗與隣人袁劉旺追趕袁劉旺被賊毆傷等情滑縣陳筠專差家丁備文關查一面將王萬宗嚴押復親到開州與該州提犯會鞫並無彼此爭競之事至蕭芳魁因在滑縣被控有案經滑縣差役拏去當經陳筠訊明釋回亦與王萬秀案無涉現在周

邦憲等所稟各情未敢扶同含混稟覆前來

臣查

陳晉所稟與周邦憲張景龍不符正在飭提周邦

憲張景龍確訊間復奉

諭旨飭將周邦憲張景龍及隨同緝拏之兵役等一併解

部候訊並飭令開州知州陳晉赴部備質等因

臣

查周邦憲張景龍所稟前情核之陳晉覆稟顯係

張大其詞希圖邀功現經刑部訊據王萬林供詞

恐另有以偽作真授意教供情事誠如

聖諭必須質訊明確周邦憲張景龍及隨同緝拏之兵役

現俱在省應請將該二員並作眼指拏之袁三袁

四及會同緝拏之民壯李玉林張秉智蕭玉林馬
兵常青蘇勵德李裕和李用正蕭芳魁一併先行
派員解部候訊臣一面飛檄開州知州陳晉卽日
束裝赴部備質謹

奏奉

硃批刑部知道

嘉慶二十一年五月二十七日

奏爲訪獲習教逆犯審明定擬事竊照新城縣獲解逆
犯于城兒及李幅祿並在逃次要匪犯辛五之母
辛王氏一案先據新城縣知縣陳景登縣丞胡鈞

會稟訪聞于城兒係辛五之甥與伊妻父李幅祿
均有習教從逆之事會同新雄營都司余國柄原
任遊擊劉乾忠率同典史周沛田把總司國光外
委盧芬帶同兵役將于城兒李幅祿拏獲并訊明
于城兒供認得受李五刀布因係隨後趕往未及
進京等語臣檢查通緝要犯單開並無于城兒姓
名至各路委員拏獲人犯動稱得受刀布往往空
言並無確據希冀妄拏邀功情事之所不免今既
據于城兒供認屬實自應搜起真贓方可定爲從
逆確據卽或布已燒棄而刀係可以埋藏改造之

物如果埋藏投棄必有其地另行銷鑄必須嚴究
何人銷鎔改鑄何物一一指證確實不得顛預定
讞當卽逐層批飭該縣詳加搜查一面派員飛提
于城兒及李幅祿來省續獲辛王氏歸案質訊隨
檄臬司盛泰督同保定府知府阿霖審訊與該縣
所訊供情無異正在核審間卽據該縣營等會同
在于城兒家炕洞內起獲尖刀一把白布一塊別
無經卷圖像及不法器械當將刀布給于城兒認
明委係李五所給由司審擬解勘前來臣親提研
訊緣于城兒卽于土城籍隸新城縣永安莊人織

布爲生係在逃次要逆匪辛守幅卽辛五之甥嘉
慶十六年不記月日子城兒聽從伊母隨同辛五
往拜李五爲師李五教令于城兒誦念八字咒語
迨後不記年月晚上于城兒在李五家中見過林
清一次李五令向林清磕頭于城兒當夜回家不
知林清何時回去十八年五月間于城兒之妻父
李幅祿因腿痛不能工作于城兒勸令入榮華會
腿疾卽可痊愈李幅祿聽信允從是月不記日子
于城兒帶同李幅祿往見辛五引進亦拜李五爲
師入榮華會並未教念八字咒語李幅祿當時回

家後無往來是年九月初間辛五往邀李幅祿隨同李五進京滋事許有好處李幅祿畏懼未從辛五以李幅祿不愿同行未便相强當給李幅祿白布一塊囑咐滑縣有人殺來帶上白布可免殺害李幅祿畏害收受旋即燒燬辛五又將于城兒邀至李五家中李五囑令于城兒一同進京滋事將來大有好處于城兒應允李五復告知同會之人口號得勝二字分給刀布約定十三日夜間在辛家村會齊起身至十三日李幅祿將于城兒喚往向其勸阻于城兒呆坐移時已經傍晚于城兒回

家躊躇不定當夜未往而辛五辛守仁辛守榮辛守信并同村人張齡姚家莊人王凱魏大賓顧家莊人顧殿英顧殿相孫傻子等待至起更時分因于城兒不到伊等先卽起身向告辛五之母辛王氏以伊等在固安之渾河口地方等候令于城兒隨後趕去十四日早于城兒至辛五家中經辛王氏告知前情于城兒卽趕至渾河口與辛五等並未會面又不識進京路徑仍行回家十七日于城兒傳聞進京各逆多被拏獲向辛王氏告知迄今辛五等皆未回村二十年不記月日辛王氏與于

城兒閒談于城兒言賞格單上有辛王之名辛王
氏以伊子別無熟識之處惟於嘉慶六年間曾與
高唐州民人趙錦赴彼傭工數日而回或者至彼
藏匿亦未可定實係隨口空談委無得有確信並
不知趙錦所住村莊嗣于城兒等先後被獲解省
逐加研審據各供晰前情詰以辛五等實在逃往
何處僉稱不知恐有串捏狡飾情弊且該犯等皆
係逆黨更恐有勾結串匿祝現等及知悉現在踪
跡情事連日隔別熬審該犯等堅供不移自應按
律擬結查律載凡謀反大逆但共謀者不分首從

已未行皆凌遲處死又嘉慶十九年正月二十二日奉

旨情罪次重人犯改爲斬立決欽此又例載叛逆案內律應緣坐婦女發福建廣東甘肅四川四省駐防官兵爲奴又邪教爲從改發回城給大小伯克及力能管束之回子爲奴各等語查子城兒入會從逆收受刀布現經起獲當堂供認確鑿至其趕至中途未遇辛五等而回並未進京不惟該犯堅供不移卽質之後經解到之辛王氏供亦相同是子城兒尙未進京實無疑義惟該犯先經入會拜李五

爲師繼復從逆收受刀布祇因行走落後未及隨同進京核其從逆情罪實爲次重于城兒卽于土城一犯應請遵

旨擬以斬立決李幅祿經辛五糾邀進京愆事畏懼未從其收受白布係爲惑於家屬免遭殺害之言所致且旋即燒燬惟該犯先經拜從李五入會仍應以邪教爲從科斷李幅祿除知情不首罪止杖流輕罪不議外應依邪教爲從改發回城給大小伯克及力能管束之回子爲奴辛王氏係在逃次要逆犯辛五之母律應緣坐訊明該氏並未入會應照

例發福建廣東甘肅四川四省駐防官兵爲奴係
逆案緣坐之犯年逾七十仍應實發示懲至辛五
是否實在高唐州境內潛匿雖無坐落村莊既有
趙錦姓名保甲戶口冊內不難按檔稽查現已咨
會山東撫臣飛飭高唐州一體上緊協拏仍飭屬
勒緝各要犯務獲另結至新城縣知縣陳景登新
雄營都司余國柄原任遊擊劉乾忠等會同訪緝
于城兒獲案並起出原收刀布審明實係從逆之
犯尙屬認真容臣存記俟再有弋獲單開要犯另
行奏請鼓勵供招咨部謹

奏奉

硃批刑部速議具奏

嘉慶二十一年五月二十七日

奏臣先經恭讀

諭旨各省緝拏要犯總當責成地方官各就本境實力嚴查其派出委員著概行撤回欽此嗣於二十日承准軍機大臣字寄五月十九日奉

上諭祝劉二逆蹤跡雖獲犯供詞不能指實然總不出直東二省境內昨降旨令將躡緝委員概行撤回該督務通飭所屬地方官各就本境認真查緝如訪有逆犯蹤

跡飛行稟報該督再派員弁馳往幫同擒拏押解勿事
虛文以收實效欽此正在分別撤回並通飭各屬間茲
於二十五日復准軍機大臣字寄五月二十四日
奉

上諭該督接奉此旨通飭所屬仍間隔旬時卽嚴檄督催
令各州縣提撕警覺勿稍懈弛如該州縣等訪有逆犯
確蹤或力不能掩捕卽令飛速密稟該督接到稟報立
派文武幹員前往協同緝拏押解來省訊明後由驛迅
速奏聞總之捕拏逆犯實心實力必能有獲不在空言
塞責也欽此

臣跪讀之下仰見我

皇上睿照周詳洞燭情僞於緝邪詰姦之中寓安良禁暴之意

惠心實政

訓諭肫誠凡屬大小臣工具有天良曷勝欽佩悅服之至至該逆等雖日久稽誅總不能遁於天壤之外誠如

聖諭果能由一州一縣一甲一牌處處稽查周密則逆犯蹤跡縱令如鬼如蜮亦將何所逃匿

臣欽遵

諭旨將各路員弁分別撤回一面仍令在本省境內嚴查仍嚴飭各州縣破除成見痛改結習共矢同仇除

莠之誠勿稍爲觀望遲疑之見務期家喻戶曉毋
擾毋縱如果偵探各逆確蹤飛速馳稟協同捕拏
而臣仍按旬嚴催密加稽查不許稍有絲毫懈怠
以仰副

聖主實力躡緝

訓勉提撕之至意謹

奏

嘉慶二十一年五月二十九日軍機大臣字寄奉
上諭昨因各省派出緝匪委員多有誣指妄拏之弊特降
旨令該督等將委員停撤通飭所屬地方官各就本境

查緝本日邾彥成奏盤獲從逆匪犯施魁供十八年九月間曾聽從逆匪閻邦漢入夥除閻邦漢一犯已降旨陳預緝拏外可見豫東一帶漏網逆匪尙復不少直隸與該二省毗連地方尤當加意查緝現在緝匪委員既經停撤惟恃地方文武員弁盡力查拏若安坐衙齋並不設法偵訪是欲待該逆匪等自行投到終無獲犯之日矣著邾彥成再行嚴飭地方文武各官於本境內多派家丁兵役就地密查如查有逆犯蹤跡或須添員協緝卽飛稟該督派委幹員馳往掩捕不可遷延坐待又蹈因循積習

嘉慶二十一年六月初三日

奏_臣於六月初二日承准軍機大臣字寄六月初一日

奉

上諭朕聞山東自袁武魁等供出窩留祝劉二逆之後處處訪緝緊嚴該逆犯等具有耳目知東省逐處搜查難以藏匿勢必逃往隣省以爲苟延殘喘之計山東隣省莫近於直隸河南前因各省委員貪功妄竽降旨概行撤回責成州縣官各於所屬境內認真查緝但恐該督等接奉諭旨一經行文通飭卽不復再問各地方官勤惰不齊在賢能者自加意訪查其不肖者因循怠玩仍

屬有名無實者那彥成方受疇於嚴飭各屬後仍密派
誠實可信之員潛往各處訪查如有緝捕疎懈者卽指
名據實嚴叅各州縣知所警懼庶不敢心存玩視再菴
觀寺院尤屬藏奸從前祝現劉第五劉成章俱有出家
爲僧之說近日直隸拏獲僧人施魁河南拏獲道士周
文盛皆係漏網逆犯可見僧道中匪徒影射潛匿者正
復不少該督撫并飭知所屬各於本境加倍留心嚴密
偵緝發現天良視如家事或可冀有弋獲也欽此臣查

前奉撤回委員

諭旨當經查明派赴山東河南之委弁因係越境訪拏是

以遵

旨卽行撤回其本省各屬派委躡緝之員弁仍責令協同
各地方官認真偵訪飭令躡探確實不可妄拏滋
累業經覆奏在案臣接據本省各委員會同該州
縣等先後稟報訪有形跡可疑之人均卽分別批
飭或解省確審或就近傳質期於根究要犯踪跡
該委員及各州縣等均各踴躍自奮仍照前認真
查拏間有報獲者容臣提審陸續具奏茲復奉
旨諄切訓諭臣惟益嚴飭所屬州縣及派委員弁務更於
本省境內加倍偵探各要犯確踪密速稟報並於

菴觀寺院及遊方僧道行止可疑之處上緊留心
察緝仍按旬嚴催斷不敢任聽該州縣等稍存因
循怠玩之見唯冀早有弋獲仰慰

厯注於萬一謹

奏

嘉慶二十一年六月初五日軍機大臣字寄奉

上諭那彥成奏查明派赴山東河南緝匪員弁因係越境
訪拏遵旨卽行撤回其本省派委躡緝之員弁仍責令
協同各地方官認真偵訪等語朕前降諭旨停撤緝匪
委員者原以緝捕奸宄本係地方官專責若一間有委

員入境州縣官必先已懷疑留心防備或委員訪知要犯地方官以爲功在委員過在己身彼此相爭相諉或吹風故縱或滅口消弭流弊百端不如責成地方官較爲切實那彥成惟當遵照前旨通飭各屬各於本境認真查緝如能獲犯則雖在該境潛匿數年之久亦斷不追論從前失察之罪仍必重需恩施若本境懵無覺察別經訪拏則必重治其罪决不寬恕至訪有端倪仍復派員前往協緝使各州縣知委員已撤責無旁貸而上司仍派員密查自不敢心存懈弛方於捕務有益朕又思口外地方與內地情形迥不相同多有不能編查保

甲之處且各廳縣多由筆帖式出身於經理地方事宜多不中肯綮其查察亦必不能周密每年朕秋獮起鑾之前該督均派員前往各處村莊稽查現在該省派出委員均經撤回可擇其明幹曉事者卽先令前赴熱河及各屬地方密爲查訪如訪有逆匪踪跡協同地方官查拏迅速解交該督審辦較爲周妥

嘉慶二十一年六月十八日

奏爲拏獲逆犯蔡明山請解部訊辦奏祈

聖鑒事竊據新城縣知縣陳景登新雄營都司余國柄新城縣縣丞胡均會稟奏准刑部原緝單內有蔡明

山一名住桃園係史進忠供出屢經訪查固安縣
桃園地方並無蔡明山其人今訪得縣屬崔家莊
有住民蔡明山係史進忠之妹婿隨會同原任遊
擊劉乾忠候補縣丞包騷率同兵役眼線於六月
初十日密赴崔家莊將蔡明山拏獲訊據供認係
史進忠妹夫因伊妻病故棺殮過薄與史進忠打
鬧斷其來往被其挾嫌仇扳並無入教助逆情事
稟報前來臣查刑部原緝次要單內本有蔡明山
之名且係已正法逆犯史進忠供出之人既係史
進忠妹夫所供仇扳等語並無確據顯屬狡展當

卽派弁迎提至省檄司督同首府連日熬審始據供稱小的今年四十六歲原籍新城縣韓村人父母早故搬在京西離

圓明園十二里地之北辛莊居住小的弟兄三箇小的居長二弟蔡二三弟蔡三都是北辛莊生長的後來三弟蔡三過繼與新城後辛莊居住的胞叔蔡二做兒子從沒往來父母死過多年小的與二弟久已分居二弟現在北辛莊居住小的前妻李氏生有一子名雨兒今年十六歲前妻死後嘉慶十四年十月裏又續娶新城縣崔谷莊史進忠的

妹子史氏做繼妻生有一子名青兒今年六歲了
十七年不記月分繼妻史氏生病思想娘家小的
就把女人同兩箇兒子搬到崔谷莊與史進忠隣
近居住是年七月不記日子史進忠勸小的入他
們榮華會說將來大有好處小的應允就拜史進
忠爲師教念真空八字真言十八年八月十三日
小的在史進忠家合他母舅魏扳兒一同喝酒魏
扳兒本姓李因過繼魏家所以也叫他舅舅聽他
說黃村大當家林清九月十五日要進京開事邀
小的與史進忠同去幫助許有好处小的們應允

到九月初八日小的在辛家莊趕集與魏扳兒撞
遇同到史進忠家魏扳兒又問小的們到底進京
不進京小的合史進忠答應說去魏扳兒又約會
小的們到他家領取刀布十一日小的與史進忠
去魏家村找見魏扳兒同到固安縣辛家莊見了
李五分給小的與史進忠白布各二塊刀子一把
還有張連也在那裏同領刀布十二日魏扳兒張
連史進忠合小的一共四人同到黃村去見林清
史進忠魏扳兒在林清客屋裏間說話有四五箇
人小的合張連是在外間只聽得裏間叫李二孛

茶那李二有三十來歲是箇弓肩史進忠們說完了話林清叫小的們分起行走約定十五日一早在京中菜市口會齊小的們一同出來那不認識四五人都送小的們內中有一箇姓宋四十多歲四方臉八字鬚鬚不知他的名字是小的向史進忠問的並沒問那幾箇人姓名小的們因多沒有帶傢伙當卽回家十三日仍是小的們四人一齊帶了刀布由魏扳兒家起身到長安城過河已經天黑就在鷺坊村西頭河堤柴堆上住了一宿是日夜裏因見近處男女有些慌亂搬家逃走小的

合史進思張連三人的刀子又長又大拏着行走
恐怕被人看破都撩棄在堤邊河內了魏扳兒的
刀子短小仍帶着走的十四日小的們四人自鷺
坊起身由豐臺上大井到了彰儀門外路北往西
便門去的道北小飯鋪裏住宿一夜那飯鋪是父
子兩人開的記得姓曹如今還認得出來的十五
日一早進彰儀門到菜市口路南茶鋪喝茶魏扳
兒出去買了三把刀分給小的們三人這時候有
同會的張明顧殿英走去見了小的們又轉回去
了小的們喝完了茶又到路北喫了早飯就進順

城門天已將午時候魏扳兒張連史進忠三人前行小的有些害怕落後幾步將近

西華門前看見同會的人甚多小的只認得李六兒顧殿英他兄弟九兒還有姚姓趙姓邵姓并魏扳兒史進忠張連都在其內其餘的人均不認識他們就從

西華門一擁進去小的未及趕到門前門已關了那時小的益發害怕就回身出了平則門到護城河邊乘空將刀布掳棄河中連夜逃回家來的至十二日小的們到黃村見林清的時候聽得林清向

魏扳兒說

西華門裏有兩箇太監引路李五拏小白旗領着在先叫魏扳兒拏了小白旗押後引路的太監一箇是楊姓並沒說明名字還有一箇姓什麼小的也記不得了至是日魏扳兒們進

西華門一千人等小的逃後並沒與他們見面不知他們的生死小的曾聽魏扳兒說過有祝現劉第五支進才這些人實未合他們見過也不知他們下落小的兄弟蔡二們都沒習教香山北辛莊地方都沒習教的人是實等語臣提訊無異查蔡明

山一犯於拏獲之時猶狡供不吐迨提省熬訊並未用刑卽據供認隨同史進忠入城滋事已到西華門因門已關閉隨卽逃走核其情節實屬次要逆犯罪不容誅相應

奏明派員將蔡明山小心押解送交刑部請

旨勅下該部俟蔡明山解到審明定擬辦理以伸

國法而快人心並派員馳拏蔡明山之子兩兒青兒續

行解部謹

奏奉

硃批刑部知道

嘉慶二十一年六月二十九日

奏報拏獲蔡明山之弟蔡三訊稱兄弟三人伊過繼與
新城縣後辛莊胞叔爲子與兩兄久已分居等
語查蔡明山旣供入教助逆所供蔡二蔡三分
居並未習教之語難以憑信且安知蔡三非部
開次要犯單內之蔡秉山相應將蔡三解部請
旨勅部究鞫奉
硃批刑部知道

那文毅公初任直隸總督奏議卷四十